

# Muzione di u Cunsigliu d'Amministrazione di l'Università di Corsica

*Corti, l'11 di maghju di u 2026*

## Muzione di l'Università di Corsica rispettu à l'insignamentu immersivu di u corsu

L'Università di Corsica Pasquale Paoli, cù a voce di u so Cunsigliu d'amministrazione, ramenta u so impegnu in a strutturazione di l'insignamentu di a Lingua è di a Cultura Corsa.

Un'andatura assignalata cù quarant'anni d'azione à u serviziu di a pianificazione linguistica in Corsica. U sviluppu di i studii corsi, a furmazione di l'insignanti, a certificazione di e cumpetenze in lingua è cultura corsa, l'attrazzera di a lingua, a ricunniscenza stituziunale, l'allarghera di l'usi suciali di u corsu in un quadru plurilingu sò tanti duminii induve l'Università di Corsica hè stata in capacità d'anticipazione, di discrizzione è di pianificazione.

Hè ind'è stu solcu ch'ella si primureghja di l'insignamentu immersivu. L'inchiesta suciulinguistica di u 2021 sparta da a Cullettività di Corsica mostra ch'è a lingua corsa gode di una raprisintazione simbolica forte è pusitiva, ma ch'ella hè sempre indebulita ind'è l'usu di tutti i ghjorni è in a tramandera in famiglia. I dati palesanu ch'è si devenu cresce i spazii d'usu di u corsu è ch'è a tramandera si deve arrimbà nant'à un'ufferta educativa è furmativa varghja.

In stu cuntestu, l'insignamentu immersivu hè una mudalità pedagogica in capacità d'accumpagnà i lucutori in a so pratica attiva è l'adopru di a lingua corsa in ogni situazione suciale è culturale. L'immersione hè un puntellu maiò di a pulitica di generalizzazione di l'insignamentu di u corsu è di a rivitalizzazione linguistica.

L'attualità cunferma a nicissità di sbuccà nant'à un quadru stabile è cuoperativu. Per un dettu, in u 2023, l'Assemblea di Corsica avia esaminatu, in un listessu insemi di rapporti cunsacrati à a lingua corsa, l'immersione à u serviziu di l'amparera di u corsu, u sustegnu à Scola Corsa, u finanziamentu di i centri d'immersione linguistica è a seguita di u grande pianu di furmazione in lingua corsa di l'insignanti. Eranu affaccati in i dibattiti, frà altru, u bisognu di sicurità i dispusitivi, furmà i persunali è valutà l'effetti di a pulitica linguistica.

Scola Corsa ch'è scularizeghja zitelli, mubilizeghja cumpetenze è risponde di manera innuvativa à una dumanda suciale si scrive ind'è l'ughjettivu generale di rivitalizzazione di u corsu. A situazione d'incertezza campata da Scola Corsa ci rinvia oghje à a capacità cullettiva à urganizà è sicurità l'amparera di a lingua è cultura corsa.

**VISTU** u raportu universitariu *Lingua corsa, lingua di u citadinu*, pruduttu da l'Università di Corsica in u 2004 ;

**VISTU** u raportu di sperti *Lingua corsa, un fiatu novu*, prupostu in u 2007 da u cumitatu scientificu di u *Cunsigliu di a lingua è di a cultura corsa* ;

**VISTA** a muzione aduttata da u Cunsigliu d'amministrazione di l'Università di Corsica u 28 di maghju di u 2013 nant' à a cuufficialità di a lingua corsa ;

**VISTA** a convenzione d'ogettivi è di mezi trà u statu è a Cullettività di Corsica 2025/2026, da rinfurzà l'ufferta di l'insignamentu bislinguu è immersivu.

**VISTA** a convenzione tripartita d'appiecazione Statu, Cullettività di Corsica, Università di Corsica per u periodu 2023-2027, in particolare e so azzioni pè a ricunniscenza di a lingua è di a cultura corsa cum'è cumpitenza prufeziunale cumuna in a furmazione di l'insignanti, u Tesoru di a lingua, l'attrazzera di a lingua corsa, e certificazione è l'ufferta di furmazione in Lingua è Cultura Corsa ;

**VISTE** e missione di l'Università di Corsica Pasquale Paoli rispettu à a furmazione, a certificazione linguistica, a ricerca, a sparghjera, è l'accumpagnamentu à u sviluppu territoriale ;

**VISTI** i travagli di ricerca di l'UMR CNRS 6240 LISA è di e squadre universitarie impegnate in i studii corsi, a didattica di e lingue è a pianificazione linguistica ;

**VISTI** i bisogni di l'attori publichi, assuciativi, educativi è territoriali rispettu à a furmazione, e risorse pedagogiche, a valutazione è a sicurizzazione di l'insignamentu in Lingua è Cultura Corsa ;

### **U Cunsigliu d'Amministrazione di l'Università di Corsica Pasquale Paoli**

Ramenta a piazza di l'Università di Corsica in a furmazione di l'insignanti, a ricerca, i studii corsi, a certificazione, l'attrazzera di a lingua è a cursufunizazione di a sucietà ;

Sustene l'insignamentu immersivu di u corsu in quant'è mudalità pedagogica di primura per a furmazione di lucutori attivi, in una prospettiva di riescita sculare è di bi-plurilinguismu ;

Cunsidereghja chì i dispusitivi publichi è assuciativi d'insignamentu immersivu devenu esse sicurizati, accumpagnati è valutati, in u rispettu di l'ugualità di i citadini è di l'esigenza di a qualità pedagogica ;

Porghje u so sustegnu à e squadre educative di a rete scola corsa è di u sistemu publicu, da attore impegnatu in a tramandera di a lingua è a cultura corsa.